

Como "World Youth Equitation Champion"

Melanie Wever a drenta Wall of Fame como deportista destaca



ORANJESTAD (AAN)--- E hoben Melanie Abigail Wever awor ta den e "Wall of Fame" di Paseo Herencia Mall, door di su titulo logra exitosamente den e "World Youth Equitation Championship". Ela expresa cu esaki ta algo hopi leuk p'e. E ta nifica hopi dedicacion y hopi entrenamiento. Su cabay, "La ley de 4G" a wordo cumpra cu e nomber ey y asina el a keda reconoci y stima aki na Aruba, el a indica, e ta su inspiracion.

Myron Wever, tata di Melanie, a laga sa cu su yiu muher a cuminsa hopi chikito den mundo di cabay. Cu practicamente 2 aña so ya e tabata bay cun'e tur dia pa mira su cabaynan. Cu 3 aña a cuminsa pon'e riba cabay y cu 3 aña y mey el a cuminsa exhibi cabay. Ora el a haci 4 aña e tabata por participa den competencia. Su amor y pasion pa cabay ta hopi grandi. Tur dia e ta emociona pa bay train na e rancho. E ta yuda baña e cabaynan y e ta yuda su tata wak pa nan. Su promer entrenador e tempo ey tabata Anthony (Nito) Kock, sigui pa Brigitte Werleman despues Jeremy Rasmijn.

Recientemente, Melanie Wever a competi den diferente competencia na Miami, Puerto Rico, Colombia, Corsou y na Aruba mes, tur caminda el a sobresali. "Pa awor aki Melanie lo sigui competi como amazona te ora e tin

edad suficiente cu e mes por bay competi nos cabaynan", Myron Wever a duna di conoce. Como profesional e por cuminsa competi ora e tin 18 aña, Kiermen ainda falta algun aña pa Melanie por sigui prepara y acumula experiencia.

Igor Kock a tin 3 aña y mey como trainer y mentor. Melanie su futuro ta uno hopi positivo, el a expresa. E tin cu djis sigui competi y wak pa nos keda mantene nos nomber.

Melanie a bai diferente competencia internacional e aña aki caba. Na April Colombia medalla di oro y na Mei Spectrum: Champion den categoria Youth equitation championship categoria 171, Champion: International equitation championship di 12-17 aña. Awor ta cuestion di mantene e titulo, Igor Kock a subraya.

Banda di esaki, Minister Paul Croes a haya esaki un bunita iniciativa cual ta reconoce un hoben pa su dedicacion na un disciplina di deporte. Esaki ta un deporte hopi elegante cu por contribui hopi mas na nos turismo di calidad.

"Hopi pabien na e famia orguyoso di Melanie cu ta ricibi un biaha mas un bunita gesto di parti di un compania priva cu tambe ta apoya nos hobennan", asina Minister Paul Croes a declara.